



CONCLUSIONES

do equipo autor deste informe

Primeira. O crecemento económico de Galicia no ano 2003 (2,4%) foi semellante ao estatal e un ano máis foi maior que o da UE.

Por sectores produtivos, a construción tivo a maior suba (4,1%) e o agropesqueiro a diminución máis intensa (-3,9%), nun ano no que as consecuencias da catástrofe do “Prestige” supuxeron un forte impacto no sector pesqueiro galego.

Segunda. O crecemento económico galego do ano 2003 supuxo unha creación de emprego neto (1,6%) inferior á estatal (3%).

Sectorialmente, a xeración de emprego neto en Galicia foi especialmente importante nos servizos (6,1%), mentres que diminuíu nos outros tres sectores.

Terceira. No primeiro semestre de 2003 o bo comportamento do sector exterior galego fixo que a taxa de cobertura se situase nun valor histórico (por riba do equilibrio) pero no segundo semestre perdeu de novo ese nivel.

Case a metade do valor das exportacións galegas corresponde ao sector automobilístico.

Cuarta. A inflación de Galicia en 2003 foi dun 2,3% (dous puntos menos que no ano anterior) e quedou no nivel máis baixo do último quinquenio.

A suba do IPC en Galicia en 2003 foi tres décimas menor que a estatal e medio punto maior que a inflación media da UE.

Os grupos de gasto de maior suba dos prezos foron en Galicia a hostalería, o ensino e a alimentación, mentres que o único que diminuíu foi o das comunicacións.

Quinta. Aínda que segue moi por baixo das porcentaxes de gasto en I+D de España e da UE, Galicia mellorou en 2003 por cuarto ano consecutivo a súa participación relativa no gasto estatal en I+D e quedou situada co mellor valor; (4,08%), desde que se elabora esta estatística, pero por baixo do peso relativo de Galicia en poboación ou produción.

Sexta. Mantense en 2003 a tendencia ó incremento do número de traballadores afiliados a Seguridade Social en proporcións globais similares os do ano anterior; (2,51%).

O aumento prodúcese no réxime xeral (3,31%) e no de autónomos (2,28%), diminuíndo pola contra o número de cotizantes no réxime agrario (-3,5%) e máis lixeiramente no de traballadores do mar (-0,6%).

Sétima. Seguindo a evolución dos tres últimos anos, en 2003 o maior aumento, tanto porcentual como numericamente, do número de afiliados, ten lugar no colectivo de mulleres situándose a media anual no 41,36% da poboación cotizante.

Oitava. Continúa a diminución numérica e porcentual dos traballadores afiliados ó sector agro-pesqueiro que non obstante se sitúa na media anual de 2003, e máis de 2,5 puntos por riba da porcentaxe estatal con respecto ó número total de cotizantes. Nos sectores industrial e da construción, Galicia supera en algo máis dun punto porcentual a porcentaxe con respecto o global estatal, e no sector servizos onde se sitúa preto do 60% de poboación afiliada a porcentaxe galega está en 2003 cinco puntos por debaixo da do conxunto do Estado.

Novena. A poboación galega do ano 2003 creceu a un ritmo que supón a cuarta parte do estatal. No conxunto do último cuatrienio, creceu oito veces menos. A poboación activa galega creceu en 2003, pero fíxoo nunha porcentaxe algo inferior á media estatal.

A taxa de actividade galega creceu en 2003 catro décimas máis que a estatal, pero queda aínda case dous puntos por baixo dela.

Décima. A poboación ocupada galega medrou en 2003 a un ritmo (1,6%) que é practicamente a metade do estatal (3%).

A comparanza das distribucións porcentuais das poboacións ocupadas de Galicia e España reflicte que as maiores diferenzas danse no sector primario (no que Galicia duplica a porcentaxe estatal) e nos servizos (sector no que é inferior en Galicia en 7,3 puntos).

A taxa de ocupación galega medrou nese ano en 0,6 puntos porcentuais, moi por baixo do crecemento medio español (1,1 puntos).

Décimo primeira. Galicia foi en 2003 a comunidade autónoma con maior crecemento absoluto do desemprego. Porcentualmente, presentou a terceira maior suba (por detrás de Ceuta-Melilla e Baleares).

A taxa de desemprego de Galicia (13,5%) supera en 2,3 puntos á media estatal.

Décimo segunda. Diminúe lixeiramente o número de perceptores de prestacións económicas de desemprego, fundamentalmente polo importante descenso dos beneficiarios da renda da inserción social. As taxas neta e bruta de cobertura experimentan un importante descenso en Galicia quedando moi por baixo das medias estatais.

Décimo terceira. A poboación inactiva galega diminuíu no ano 2003 (3,1%), e fíxoo con máis intensidade que no ano anterior (1%). A diminución foi máis forte nas mulleres (3,4%) que nos homes (2,7%). Por grupos de idade, só creceu no de 55 e máis anos.

Décimo cuarta. Continúa a tendencia favorable en relación activos/pasivos do Sistema de Seguridade Social - maior aumento interanual do número de cotizantes fronte o de pensionistas. Non obstante a diferenza con respecto á do total estatal é moi considerable e as provincias de Lugo e Ourense seguen a ter un número de pensionistas maior que o de traballadores en alta.

Décimo quinta. A 31 de decembro de 2003 o número de empresas en alta en Seguridade Social é levemente inferior ó do ano pasado, xa que, incrementándose en tódolos demais réximes, o acusado descenso das pertencentes ó réxime especial agrario produciu un resultado negativo. Referido ó réxime xeral, as empresas de menos de 10 traballadores representan máis do 87% do total. En canto a aperturas de centros de traballo, a construción, con gran diferenza segue a se-la actividade que máis centros abre e que máis traballadores ocupa neles.

Décimo sexta. A contratación presentou unha clara continuidade con respecto ó ano precedente. A temporalidade e a ascendente rotación dos empregados temporais son coñecidas características estruturais do panorama contractual e é o problema máis persistente para quen mantén contratos de duración determinada. Do total de contratos rexistrados no ano obxecto de estudo o 91,64% da contratación é temporal e en tanto que a contratación indefinida representa o 8,36%.

Décimo sétima. A modalidade de contratación eventual sitúase en primeiro lugar, pasando ó segundo lugar –segundo número anual de contratos rexistrados- o contrato de obra ou servizo determinado.

Décimo oitava. A tradicional preponderancia dos homes na contratación, convértese en preponderancia feminina ou se modera nas modalidades contractuais de interinidade, os iniciais de fomento do emprego, os de inserción e naqueles que se anoan ó contrato a tempo parcial.

Décimo novena. O cadro 5.42 (efectivos laborais, segundo tipo de contrato) amosa que un 62,3% de tales efectivos manteñen un contrato indefinido, en tanto que un 37,7% vincúlanse mediante unha contratación temporal. A contratación indefinida gaña un punto nesta relación respecto ó ano precedente, derivada principalmente do sector privado.

Vixésima. As empresas de traballo temporal, cuxo número diminuíu en relación co ano anterior, viron descender lixeiramente os contratos de posta a disposición seguindo a tendencia dos últimos anos. O maior número de traballadores cedidos por empresas de traballo temporal corresponde ós pertencentes a empresas de ámbito estatal, que supoñen case o 78% do total.

Dos contratos de posta a disposición, os de obra ou servizo determinado e circunstancias de produción supoñen máis do 90% do total.

Vixésimo primeira. Segue a tendencia de incremento do número de convenios colectivos vixentes na nosa comunidade autónoma, (576 de empresa e 125 de sector)

No ano 2003 negociáronse por vez primeira 36 convenios (1 de sector e 35 de empresa).

A 31 de decembro de 2003, hai en Galicia 701 convenios colectivos vixentes de xeito expreso ou prorrogado tacitamente, destes tan só 54 teñen un ámbito superior á provincia.

Vixésimo segunda. O incremento salarial nos 253 convenios asinados ou revisados en 2003, foi do 3,5%, superior ó IPC previsto e ó IPC real, pero inferior ó do ano 2002.

O 94% dos convenios colectivos recollen cláusulas sobre saúde laboral.

Incrementábase o número de convenios que recollen cláusulas sobre discriminación, Fronte a isto, tan só o 18% dos convenios colectivos recollen cláusulas sobre acoso sexual.

No ano 2003, 32 convenios colectivos recollen cláusulas de sometemento ó AGA, a maior parte deles de sector.

Vixésimo terceira. Por primeira vez desde 1994 descende o número de accidentes en Galicia. A sinistralidade global diminuíu notablemente en relación co ano anterior sendo esta porcentaxe sensiblemente superior ó experimentado no total de España.

Polo que se refire ós accidentes en xornada de traballo o descenso foi do 2,95%.

En relación ás actividades económicas, a construción segue a ser a que maior número de accidentes rexistra salientando claramente sobre as demais.

Vixésimo cuarta. Os accidentes mortais en xornada de traballo experimentaron globalmente un descenso do 7,84%.

A construción e a pesca son as actividades que maior porcentaxe de accidentes mortais teñen en relación coa poboación ocupada nelas afectando en maior medida ós traballadores que teñen contratos temporais.

O grupo de idade que máis accidentes mortais rexistra é o da franxa comprendida entre os 45 e os 54 anos.

Vixésimo quinta. O índice de incidencia (relación accidentes/poboación asalariada) do total de accidentes en Galicia está cerca de dez puntos por debaixo do índice estatal, só tendo tres comunidades menor índice. No que se refire ó índice de incidencia de accidentes mortais, Galicia ocupa o terceiro lugar cun índice de case catro puntos por riba da media estatal.

Vixésimo sexta. En relación coa conflictividade, continúa en 2003 a tendencia decrecente de anos anteriores, xa que, aínda que en número de folgas provinciais se mantén a mesma cifra, obsérvase un claro descenso dos días de folga, os traballadores participantes e as xornadas non traballadas.

Vixésimo sétima. Analizando os resultados dos procesos electorais en Galicia durante o último período de catro anos e, tendo en conta os representantes con mandato n vigor a 31 de decembro de 2003, a central sindical UGT, co 31,95% do total, é a que tivo maior número de representantes dos traballadores, seguida de CCOO e CIG con 30,51% e 26,26%, respectivamente.